

INUIT ATAQATIGIIT

Inatsisartuni



19. juli 2019

UKA2020/124

Inatsisartut Suleriaasianni § 36 naapertorlugu apeqquaqat aallaavigalugu oqallisissiaq imaattoq matumuuna saqqummiuppara:

Aalisarnermut akuersissutinik pisassiissutinillu tunniussisoqalertinnagu aalisarnerullu iluani kiffartuussinissamut isumaqatigiissuteqarnissaq pitinnagu akiligassaareersunik pisortanut akiitsorilersimasanut qularnaveeqqusiisimangikkaanni pisortanut akiitsut 100.000 koruuninit amerlanerunnginnissaannik qinnuteqartumut piumasaqaateqalernissaq pillugu apeqquaqat aallaavigalugu oqallinnissamik siunnersuut.

(Inatsisartunut ilaasortaq Sofia Geisler, Inuit Ataqatigiit)

Neqerooruteqartitsisarneq pillugu inatsimmi §19, imm. 4-imi¹ allassimavoq suliffeqarfik neqeroortitsinermit peqataatinngitsoorneqarsinnaasoq suliffeqarfik pisortanut akiligassaareersunik 100.000 kronit sinnilinnik Nunatsinni nunamiluunniit suliffeqarfiup pilersinneqarfigisimasaani akileraarutitut akitsuutinillu akiitsoqarpat. Inatsimmut tassunga tunngatillugu nassuiaatini allaqqavoq aalajangersakkap taassuma pisortanut akiitsut millisarnissaat aammalu akiitsoqalernissamik pinngitsuuisitsiniarneq siunertarigaa.

Sulisitsisut uppernarsarpat neqerooruteqartitsisarnermut atatillugu 100.000 koruunit sinnerlugit akiitsoqannginnissamik piumasaqaat ukiorpaalunngortuni pisortat sanaartornerup iluani neqerooruteqartitsisarnerini tamarluinnangajanni atorneqartoq, neqerooruteqartitsinernili minnerusuni imaassinnaasoq malinneqartuaannangitsoq.

Taamaasilluni pisortat suliassat aningaasalersugaannut suliffeqarfiit namminersortut appakaassinnaanerat inatsisit aqutigalugit killilersorneqarpoq.

Tunngaviatigut isumaliortaaseq alla Naalackersuisunit atorneqarpoq pisassanut akuersissutinik akuersisarnermut, taamalu inuiaqatigiit pigisaannik atuinissamut appakaanniarneq pineqartillugu.

§37 naapertorlugu apeqqutitut marlunnu² akissutini aalisarnermut akuersissutinut pisortanullu akiligassaareersunik akiitsoqarnermut tunngasunik imaqtunut Naalackersuisut akissummini aalajangiusimavaat aalisarnermut akuersissutinik qinnuteqartoqartillugu qinnuteqartup pisortanut akiligassaqannginnissaa piumasaqaatinut ilaatinniarnagu.

Inuiaqatigiit pigisaannik atuinissamut appakaanniarnermi periuitsit inatsisillu atorneqartut assigiinngitsut marluk pisortanit taamaasilluni atorneqarput. Apeqqut tassaalerpoq inatsisiliortut

¹ Pisortat oqartussaaffigisaanni suliffeqarfiinilu nioqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaat nr. 6, 12. juni 2019-imeersoq

² § 37 naapertorlugu apeqqut 2018-176, apeqqut nr. 6 & § 37 naapertorlugu apeqqut 2019-237, apeqqut nr. 6

Inatsisartut inatsisinillu atuutsilersitsisussat Naalackersuisut innuttaasunik taamaasillutik immikkoortitsisinnaanersut.

Inuit aalisarnermut akuersissutinik pigisaqartut 17-it 2018-imi pisortanut akiligassaareersunik 1,0 aamma 5,0 mio. koruunit akornanniittunik akiitsoqarput, inuillu marluk aalisarnermut akuersissutinik pigisaqartut pisortanut akiligassaareersunik 5,1 aamma 10,0 mio. koruunitakornanniittunik akiitsoqarlutik.³

Paasisinnaalluarpara atonerluisinnaaneq aammalu nalorninartumik aningaasatigut ingerlaneq pissutigalugu akiliisinnaajunnaarsinnaanerit pinngitsoorniarlugit killilersuineq atorneqassappat, taamaassappallit tamanna kikkunnut tamanut inuiaqatigiit pigisaannut appakaanniartunut atuutsinneqartariaqarpoq. Allatut iliussagutta killilersuutit assigiinngisitsisut tamaasa peertariaqarpat. Tamannali periarfissatut uanga isiginngilara. Akerlianik periuitsit inatsisillu tunngaviatigut tamanik assigiinngisitsinngitsut atuutsinneqartariaqarput, inuiaqatigiit pigisaannut appakaanniarnermi atuutsinneqartut.

Tamannarpiarlu tunngaviuvoq oqallisissiaq una Inuit Ataqtigiinniit saqqummiukkatsigu, oqallisigisassanngortillutigu inuiaqatigiit pigisaannik atuiniarluni appakaanniarnermi piumasaaqatigineqalissasoq qinnuteqartoq pisortanut akiligassaareersunik 100.000 koruunit sinneqartunik akiitsoqassanngitsoq aamma/imaluunniit akiitsut 100.000 koruunit qaangerneqarpata taakkununga qularnaveeqqusiisoqqaassasoq.

Aalisartunut pisortanut akiligassaareersunik akiitsoqalersimanngitsunut uunga qulerutarititaq kinguneqarnaviangilaq.

Akiliisinnaagaluarluni akiliiumannginneq akiligassaareersunik akiitsoqalersimanermit patsisaappat akiligassallip pisussaaffimminik naammassinninnissamut piumasuseqarnera annertulersinnaavoq. Taamaassimappat pisortanut akiitsut ikinnerulersinnaapput.

Aalisarnermut peqataasunut akiliisinnaassuseqaraluarlutik akiligassaareersunik pisortanut akiitsoqalersimasunut akiitsorilersimasanut ikilisaanissamut piumasuseqarneq annertunerulersinnaavoq.

Aalisarnermut peqataasunut akiliisinnaassuseqarnerup killeqarnera pissutigalugu akiligassaareersunik pisortanut akiitsoqalersimasut siunnersuut manna aqqutigalugu aalisarnermut akuersissutinik, pisassiissutinik imaluunniit kifpartuussinissamut isumaqatigiissutinik pissarsisinnaajunnaassapput.

Uani pineqartoq tassaavoq inuiaqatigiit pigisaannik atuiniarnermi kikkut tamarmik inatsimmi assigiimmik pineqarnissaat. Taamaaliortoqarsinnaangippat taamaaliortoqarumanngippallu assigiinngisitsisoqarnissaa sooq pisariaqarnersoq tunngavilersorluaqqissaarneqartariaqassaaq.

Aamma pineqartoq tassaavoq akiitsut pinngitsoorneqarsinnaagaluartut pinngitsoortinniarnaqarsinnaagaluartulluunniit pilertarnerannut pillugit pisortat akuersaannginnerisa takutinnissaa. Innuttaasut pisortanut akiitsui 2018-ip aallartinnerani 959 mio. koruunupput, 2016-imi januarimiit 9,6%-imik qaffariarsimallutik. Innuttaasut akiitsuinut

³ § 37 naapertorlugu apeqqut 2018-142

isiginnittaaserilersimasinnaasaannut tamanna ersiutaasinnaavoq, taamaappallu tamanna naalackersuinikkut iliuuseqarfigineqartariaqarluni.

Inuiaqatigiit pigisaannik atuinissamut appakaanniarnermi tunngaviusut suusariaqarnerannik Inatsisartuni pitsaasumik oqallinnissarput pingaaruteqarluinnartoq isumaqarpunga. Taamaattumik Naalackersuisut partiillu sammisaq pillugu saqqummiinissaasa tusarnissaat qilanaarivara.

Taamatut oqarlunga pissarsiffiulluurtumik oqallinnissamik kissaappassi.